

閉目思北嶽恒山黑帝君姓諱字形長五寸五分頭戴玄玉通天寶冠玄羽飛衣駕乘黑龍從神太玄玉女十二人從北嶽來降兆室良久黑帝君化為嬰兒始生之狀在累氣之中隨氣入兆口中徑至腎府思肝生青氣以貫繞腎府青黑二氣混沆相著如碧雲之沓煙覺腎中薰熱便五咽仰祝曰

五氣玄天上始精流結氣凝靈號曰仙廬安鎮北恒黑帝所遊遠冥北單駉龍駕遊今日王吉萬靈開圖五氣徘徊慶雲四敷仙童執簡太玄度符記我仙籍金錄上書迴真曲降混合嬰孩二氣交絡洞灌我軀玄冥提攝神仙為侍奉享天地萬劫無休畢引累氣五咽止行此道北嶽靈官黑帝降真致太玄玉女五人給以使命通致啓乞上闕九天生死父母罪名刑書係屬北嶽並蒙解除得度三惡之道上升天室太妙上法普度無窮行此道常當夷心靜思意注分明靈真易感得其法式不移年而親神行來出入之向方面天官司迎魔靈消伏不敢干前心聰慧慈

自審吉凶五嶽五帝常為友賓神明交通坐致神仙

太上洞玄靈寶投簡符文要訣



洞玄靈寶自然九天生神章經序說 案

聽義

原夫三洞一乘教典大科分三一序分二正宗分三流通分今此經乃三洞自然之炁結成靈文非由人所演說故經題不冠以太上經首不冠以道言不立序分不言時處而所謂洞玄靈寶者乃述經者以其所載之道當隸於本部也從經首至太清太極宮即述三寶之本跡也自此三號雖年殊號異本同一也至離其本真耳言三炁為天地萬化之原而人則與之同根合德也內分五章一章自此三號至開元贊本宣化二章自炁清高澄至垂受生成分辯儀象立真三才三章自天地萬化至天地之極也乃攝跡崇本四章自人之受生至終不生也言人貫三才重生緣會五章自夫人至本真耳乃讚重勸修次自九天生神章至所聞也讚章本起功德無量內分四章一章自九天至自然之章贊章自然體全用具二章自天寶至生人言誦章功德玄應隨量三章自學士至還人言尊品既

依應量自利四章自三寶至所聞也乃歸本反寂次自夫學上道至登晨乃讚重教修功用差等內分六章一章自夫學上道至坐致自然讚勸齊舉二章自三寶至同仙言秘重尊奉三章自三元至考身乃勉宿善戒輕傳四章自修行至寶章捨事入道澄心契元五章自誦之一過至一時生神言如法行道功德等漸六章自九過為一遍至登晨乃序效階差終致極果以上乃正宗分也此經既以自然為宗故首不立序分至此乃立出經之序分也自元始天尊至賜所未聞為一段中分九章一章自元始天尊至嘯朗九天權立時處顯示容儀二章自是時至披心乃神王應機將陳已問三章自於是至侍晨乃整儀啓問自述已職四章自方當乘機應會至善惡當分乃乘時興愍宣任濟善五章自亦明以來至以充儲官明三代選人以充仙任六章自如此之例至毫分無遺明隨因證果詮次差等七章自又九幽之府至開大有之民明遷拔宿善充太平民八章自當此之時至

亦臣之憂矣明應會料別慮失平等九章自太期既切至賜所未聞乃開心自任哀末法要次自於是天尊至慎勿輕傳明出經緣儀中分二章一章自於是天尊至妙亦難超明天尊應機讚道將授二章自子既司帝位至慎勿輕傳乃天尊讚許勉勸戒秘以上乃序分也自登命至復位乃流通法要具述儀度中分二章一章自登命至神王乃出命傳經衆真具儀二章云法事既畢諸天復位乃授經既竟歛儀反寂乃流通分也次自天尊重告至可不慎之焉乃申贊秘重然後出章也

五劫開化說釋天義九

元洞玉曆章云混元溟滓大梵彌羅諸天未分九陽冥合三因九轉六變七徇元始肇形五劫初化乃命梵元祖晨道君筆錄天元運乘五劫故元洞者以名祖炁王曆者以紀天元劫運五周復歸其一自一炁分化三因成九若龍若蟻盤曲九道總九陽祖炁之元太上以三九運梵三五乘元合四十二炁三乘九為二十七三乘五為十五共成四十二以開始青天元祖炁明東

方始青之元應九陽木王之初故東方得九炁以分天境劫號龍漢次九因重復陽炁開明亦文流光敷落五度玄圖丹書太上以三乘五三轉朱英合二十四炁三乘五為十五三乘三為九共十四以開南丹天元祖炁明南方丹光之元應三陽火王之初故南方得三炁以分天境劫號亦明次復九因重積中黃化元天緯周躔梵元乘五太上以五五三徇混陽十二合五十二炁五乘五為二十五五乘三為十五乘十二數共成五十二之數也以開中黃天元祖炁明中靈黃華之元應五陽土王之初故中央得一十二炁以分天境劫號上皇次九元復因素景肇陽七明煥梵五緯乘天太上以七五三乘合三十六炁七為二十一三乘五為十五共成三十六以開素靈天元祖炁明西素皓景之元應七陽金王之初故西方得七炁以分天境劫號延康次復九因周竟混化歸本一炁肇明太上以二五乘十三積元陽合三十炁謂以二五相乘為十三積其十共成三十以開北玄天元祖炁明玄冥上景之元應一陽水王之初故北方得五炁以分天境劫號開皇是也

龜山玄錄云天尊結元洞之炁為玉曆之書以龍漢為初劫赤明為中劫延康為終劫靈章經云龍漢承天太上居混沌之初御先天康界開號赤明也太上居混沌之初御先天之炁為萬化祖積陽成天陽數奇天數二十有五三一三五七九是也一本居北一六無位寄於中央以為布化之始中位向南者也故布炁之序始於南而次三居之南不可以無對故北為南對而次五居之先天布炁皆逆數也炁有屈伸故位有逆順而逆所以為順也故由北而西次七居之由西而東次九居之東方得九數者終於此則始於此此九所以為萬物元而為後天入用之本也數窮於九變於三十六三五七九為二十四列於四方中央無位之一虛中而運十二炁以成三十六之數先天布炁則一自中始後天運炁而為二一伸一屈故兩其五而為十合成一二也數變於三十六二十四既列於外得徑一圓三之二則中央所存之數十二矣三十者即九之變故分五劫天境皆以九言也觀之五子歸庚之法庚子居一而具十二支之全炁亦一義也五子元乃西方甲子金七數而過庚南方戊子火三數而過庚東方壬子木九數而過庚中央庚子土即一不動方五高四子所歸故統十二辰之炁也然則五方所以必運庚者乃炁數之變也

所合之數何與曰其數亦從中起虛其中以統四方之數故三五七九在四方為二十四炁之宗而無位之一六分之四方各得其七而為二十八宿之元一本居北以其一乃五乃中之數故無定位而四方各異所以與五互見於中此而合其數為六也一為生始居之以為生成之本也合二十四與二十八即中央所合之五十二也先天之數逆布故先南而後北先西而後東亦如三五七九之序也後天之炁順行故木而火而土而金而水五劫所以運也太上藏其一於中以為資始之本一藏則六用矣是以總四方之六而布於直而之南為二十四復加其六而布於北為三十次西之三十六東之四十二皆加六焉六既用矣又藏其用則四十二而三十六三十六而三十三而二十四二十四即四方之三五七九也分而合合而分乃造化之至妙而所謂應者在其方則應其數矣此太上藏天一而分天境復用其六以為萬化生成之本乎

洞玄靈寶自然九天生神章經解義卷之一

清源天慶觀道士圭山董思靖著

釋經題

此經乃三洞飛玄自然之炁結成靈文超於視聽之先出身名言之表最真欽奉萬聖尊崇本秘於玄都紫陽玉臺因飛天神王憫下世陽九百六之災親禮天尊懇請宣布於是高真得而降授塵世得而流傳也所謂洞玄靈寶者蓋三洞中一部之名自然九天生神章者即部中一品之目三洞則洞真洞玄洞神是也洞以虛通無外為義玄以玄妙不測為義此道本體包貫三才混融萬有而不可致詰也靈寶者表神化之無方為衆聖之所貴其在人也通達無礙之謂洞應感無滯之謂玄神慈而化之謂靈炁凝而妙之謂寶自然九天生神者自然明其體也九天示其跡也生神顯其用也其體混成本乎無待故曰自然九者陽數始於一而究於九也天者是理所寓之跡也生神者由天而命乎人以生